

Tabell C-fk

Saker med særskild fordeling. Fylkeskommunane

Følgjande saker ligg i tabell C i 2017:

Kol.	Sak	Departement	Beløp i 1 000 kr
1	Opprusting og fornying av fylkesvegnettet	SD	1 420 254
2	Kompensasjon forskrift om tunnelsikkerheit	SD	286 328
3	Kompensasjon auke i CO ₂ -avgifta	SD	2 078
4	Ferjeavløysing	SD	97 683
5	Vegadministrasjon, Oslo	SD	8 661
6	Fagskular	KD	429 392
7	Tilskot til barnevern, Oslo	BLD	566 399
8	Kompensasjon for endringar i inntektssystemet	KMD	255 000
9	Sum		3 065 795

Kolonne 1 – Styrking av rammetilskotet som kan nyttast til å fornye og ruste opp fylkesvegnettet

I saldert budsjett 2014 blei rammetilskotet til fylkeskommunane styrka med 780 mill. kroner, som kan nyttast til å fornye og ruste opp fylkesvegnettet. Ordninga blei vidareført og trappa opp med 200 mill. kroner i 2015 og 160 mill. kroner i 2016. I 2017 blir ordninga, i tillegg til prisjustering, trappa ytterlegare opp med 200 mill. kroner. Midlane er som tidlegare i år fordelt mellom fylkeskommunane på grunnlag av ei kartlegging av vedlikehaldsetterslepet på fylkesvegar gjennomført av Statens vegvesen.

Kolonne 2 – Kompensasjon for meirutgifter knytt til iverksetjing av tunnelsikkerheitsforskrift for fylkesvegar

Frå 2015 er fylkeskommunane kompenserte for meirutgifter ved forskrift om minimum tryggleikskrav til visse vegg tunnelar for fylkesveg og kommunal veg i Oslo (tunnelsikkerheitsforskrift for fylkesveg mv.). 2016-beløpet er prisjustert.

Kolonne 3 – Kompensasjon for auke i CO₂-avgifta

Det blei i revidert nasjonalbudsjett for 2015 gjeve 1 mill. kroner i kompensasjon til fylkeskommunane i samband med vedtak om å auke CO₂-avgifta på LPG og naturgass frå 1. juli 2015. I 2016 blei kompensasjonen vidareført med heilårseffekt. 2016-beløpet er prisjustert.

Kolonne 4 – Ferjeavløysing

I 2015 blei midlar til ferjeavløysingsprosjekt som fylkeskommunane overtok frå staten i samband med forvaltningsreforma i 2010 lagt inn i utgiftsutjamninga. Frå 2016 blei ferjeavløysingsmidlar for åtte ferjeavløysingsprosjekt på nytt lagt i tabell C, jf. kommuneopposisjonen for 2016. Prosjekta fekk eit beløp tilsvarande dei beløpa ei ferjeavløysingsordning for riksvegferjer ville gjeve i 2016. Tal frå Samferdselsdepartementet/Vegdirektoratet. 2016-beløpet er prisjustert.

Kolonne 5 – Vegadministrasjon Oslo

Ordninga med sams vegadministrasjon etter forvaltningsreforma inneber at staten og fylkeskommunane gjer bruk av den same vegadministrasjonen på regionalt nivå til å utføre riks- og fylkesvegoppgåver etter veglova. Oslo kan ikkje nytte sams vegadministrasjon, men må byggje opp eigen administrasjon. 2016-beløpet er prisjustert.

Kolonne 6 – Fagskulær

I samband med forvaltningsreforma blei drifts- og finansieringsansvaret for fagskulane overførte til fylkeskommunane, og tilskotet blei innlemma i inntektssystemet. For åra 2010 til 2016 blei det gjort ei særskild fordeling av tilskotet utanfor utgiftsutjamninga på bakgrunn av talet på registrerte fagskulestudentar. Det er i statsbudsjettet for 2017 gjort framlegg om at tilskotet òg i 2017 blir fordelt særskild basert på rapporterte studenttal. Grunnlagstala er oppdaterte, slik at talet på registrerte fagskulestudentar hausten 2015 er lagt til grunn for fordelinga av midlar i 2017 til dei fylkeskommunalt finansierte fagskuleutdanningane.

Kolonne 7 – Tilskot til barnevern o.a., Oslo

Den delen av det tidlegare hovudstadstilskotet som var grunngjeve i Oslo sitt ansvar for den delen av barnevernet som blei gjort statleg i 2004, er gjeve ei særskild fordeling i tabell C. I 2015 blei det lagt inn midlar til kjøp av plasser frå ideelle sentre for foreldre og barn. I 2017 blir desse midlane trekte ut (14,8 mill. kroner i 2017-kroner).

2016-beløpet, ekskl. midlane til ideelle sentre for foreldre og barn, er prisjustert. I tillegg er beløpet oppjustert med anslått vekst i talet på 1–18-åringar i Oslo frå 2016 til 2017. SSB har anslått veksten i 1–18-åringar i Oslo frå januar 2016 til januar 2017 til i underkant av 1,5 pst.

Kolonne 8 – Kompensasjon for endringar i inntektssystemet

For å lette overgangen til nytt inntektssystem blei det i statsbudsjettet for 2015 gjeve ein ekstra tapskompensasjon på til saman 125 mill. kroner til fylkeskommunar som tapte meir enn 200 kroner per innbyggjar på fordelingsverknaden av ny kostnadsnøkkel/innlemming av saker med særskild fordeling. Samla beløp blei auka med 60 mill. kroner i saldert budsjett 2015, 10 mill. kroner i revidert nasjonalbudsjett 2015 og 60 mill. i saldert budsjett 2016.

I saldert budsjett 2016 blei samla tapskompensasjon fordelt med 125 mill. kroner til alle fylkeskommunane som taper over 200 kroner per innbyggjar, 45 mill. kroner til alle som taper over 500 kroner per innbyggjar og 85 mill. kroner til alle som taper over 700 kroner per innbyggjar på nytt inntektssystem frå 2015, til saman 255 mill. kroner. I 2017 blir beløpet vidareført nominelt.

Kolonne 9 – Sum saker med særskild fordeling

Sum av kolonne 1–8. Summen er nytta i tabell 2-fk, kolonne 3.